

UKA 2020/41

Ilinniartitaaneq sorleq, assassornikkut atuagarsornikkullu Inuit Kulturitoqqarput pillugu ilinniartitsiviusinnaasutut piukkunnarnerullunilu ukkatarinnilluarnerusinnaanersoq pillugu Naalackersuisut misissueqqullugit peqquneqarnissaannik inatsisartut aaliangiiffigisassaattut siunnersuut. Misissuinermittaaq ersarissarneqassaaq ilinniareernerup kingorna, ingerlariaqqiffiusumik ilinniaqqinnissamut, suliffissaqarnikkullu periarfissat suusinnaaneri, nunanik allanik suleqateqarnikkut periarfissat, aningaasatigullu kingunerisinnaasai, iluaqutissat ajoqutissallu, kiisalu ilinniagaqarfimmuut pioreersumut ilinniarfissap inissinneqarsinnaaneranut periarfissanut tunngasut ilanngullugit misissorneqassallutik. Misissuinerup inerneru kingusinnerpaamik UKA2021-mi Inatsisartunut agguanneqarsimassaaq.
(Inatsisartunut ilaasortaq Peter Olsen, Inuit Ataqtigiit)

aamma

UKA 2020/46

Inuusuttut 16-it 26-illu akornanni ukiullit sulilersut imaluunniit ilinniakkamik ingerlatsisut amerlisarneqarnissaat siunertaralugu immikkut iliuseqarnissamut Naalackersuisut 2026-ip tungaanut aningaasatigut allaffissornikkullu sinaakkutissanik ilaqartumik periusissiamik UPA-mi 2021-mi saqqummeeqqullugit Inatsisartut aalajangiiffigisassaattut siunnersuut.
(Inatsisartunut ilaasortaq Múte B. Egede, Inuit Ataqtigiit)

aamma

UKA 2020/85

Qanoq illoqarfinni nunaqarfinnilu suliffissaaleqiffiusuni qarasaasiakkut attaveqaatitigut assingusutigulluunniit inuusuttunut inersimasunullu misiligutitut pikkorissartitsinernik ilinniartitseqqinnernillu neqerooruteqarsinnaanermik pilersitsisoqarsinnaanera pillugu nassuiaammik kingusinnerpaamik UPA2022-mi saqqummiusseqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Tillie Martinussen, Suleqatigiissitsisut)

Akissuteqaat

(Suliffeqarnermut, Iisimatusarnermut Avatangiisinullu Naalakkersuisoq)

Siullermeerinnineq

Naalakkersuisut siunnersuuteqartut Peter Olsen, Inuit Ataqatigiit, Múte B. Egede, Inuit Ataqatigiit aamma Tillie Martinussen Suleqatigiissitsisuniit, ilinniartitaanerit, pikkorissartitsisarnerit aamma suliffeqarnerup iluini annerusumik ataqatigiissaagaasumik ingerlatsinissaq pillugu periusissialiornissamut, inuusuttuaqqat siunnerfiusut immikkut isiginiarlugit periarfissat pillugu siunnersuutaannik qutsavigaat.

Naalakkersuisut sulissutigaat ingerlatsinerit assigiinngisitaartut akornanni annertusisamik suleqatigiinnermik tunngaveqartumik ingerlatsisoqalernissaa, isumaqaratta suleqatigiinneq aamma ataqatigiissaarineq iluaqutaassasut innuttaasunut kiisalu imminut pilersortuulluni inuunermt. Inuuneq tamaat aningaasarsiatigut isertitat isiginiaraanni ersarissunik ataqatigiipput ilinniarsimassuseq aamma agguaqatigiissillugit aningaasarsiat, tassa imaappoq, qaffasinnerusumik ilinniarsimagaanni aamma qaffasinnerusunik aningaasarsiaqartoqassasoq. Taamaattumik nuannaarutissaavoq inuit meeqqat atuarfiata saniatigut allanik ilinniagaqarsimannigitsut ikiliartornerat. Innuttaasut imminnut pilersortuunerat aqutissaavoq namminerisamik pituttorsimanani aningaasarsiornissamut, tamannalu anguneqartarluni ilinniagaqarnikkut, pikkorissaqqittarnikkut aammalu eqeersimaarluni suliffeqarnermi peqataanikkut.

Naalakkersuisut maanna inaarsarpaat suliffeqarnermut periusissiasaq nutaaq, tassanilu immikkut aallunneqarput inuusuttuaqqat aamma inuusuttut 16-iniit 25-inut ukiullit ilinniagaqarnissaat imaluunniit suliffeqarnissaat. Periusissiaq imaqarpoq Majoriami siunnersuisarnerit ilitersuisarnerillu nukittorsarneqarnissaannik, - tamatumunngalu piunasaqaataapput ersarissunik malittarisassaqaarnissaa ilinniartitaanerit, isumaginninnikkut suliniutit aamma suliffeqarnermik ingerlatsiviusut assigiinngitsut akimorlugit aqqissuussaasunik.

Tamatumalu saniatigut aamma suliffeqarnermut periusissiami tikkuartorneqarput suliniutissat qarasaasiatigut e-læring-ip, najukkani namminerni ingerlatsinerit annertusarneqarnissaanut aqutissat. Aamma misilittakkat ilinniarnertuunngorniartfinni qarasaasiatigut e-læring-imik atuineri 2018-imi aallartsittumi pigineqartut iluaqutiginneqarsinnaapput. Maanna nappaassuaq Corona atuuttoq aamma ilinniartitaanernik ingerlatsiviusuni assigiinngitsuni amerlasuunilu misilittakkanik pilersitsiortorpoq e-læring-ip atornerqarneranut atatillugu.

Naalakkersuisut 2018-ip pilersippaat suliniut taaguuteqartoq: Imminut pilersortuuneq annerusoq, - Naalakkersuisoqarfiit ingerlatsiviusut akimorlugit suleqatigiilluni suliniutaasoq, siunertaqartoq suliassaqaarfiit akimorlugit aaqqiissutissanik pilersitsisoqartarnissaanik kommunit aammalu suliffeqarnermi illuatungeriit akornanni suleqatigiinnikkut. Suliniut ilaatigut suliffeqarnermi aqqissuusseqqinnermut atatillugu inassuteqaatinik assigiinngitsunik kinguneqarniartussaavoq. Suliniummi tassani immikkut inuusuttuaqqanut suliassaqaarfik isiginiarneqarpoq.

Ilisimasat aamma sungiusaaneq kulturikkut naleqartsitatsinnik qangersuaanilli pigisatsinnik inuusuttuaqqanik aamma inersimasunik nalinginnaasumik perorsaanerup ilagai qaangiinnarneqarsinnaanngitsut. Ullumikkut tamanna aamma ilinniartitaanerni arlaqartuni ilaavoq. Ilisimatusarfimmi Inuiaqatigiit kulturiat oqaluttuarisaanerallu pillugit Institutsimi kulturi aamma oqaluttuarisaanermi Kalaallit Nunatta inunikkiartornera ilinniarneqarsinnaapput, siunnersuummi matumani eqqaaneqartut. Qaffasinnerusunik ilinniartitaanernut atatillugu Naalakkersuisut pisuni immikkut ittuni ingerlatsivinnut pisussaaffiliisinnaapput, aningaasaqarnikkut periarfissat pisariaqartut pigineqartillugit. Taamatulli suliniuteqarsinnaanermut tunngaviusussaavoq ilinniartitaanermut ingerlatsiviup pineqartup oqaaseqartinneqareersimanissaa. Nunatta isiginnaartitsinermik ilinniarfiata ilaatigut kulturikkut ileqqutoqqat ilaat, assersuutigalugu qilaatsersorneq ilinniartitsinermi ilaatsittarpai. Kalaallisuuuliornermik Ilinniarfik akulerunneqarsinnaapput inuit kulturiani ileqqutoqqanik ilinniartitsinermi sammisani naleqquttuni, ammerinermut attuumassuteqartuni.

Ilinniartitaanermik ingerlatsiviit pioreersut killilersorneqaratik imaluunniit peqquneqarnermikkut aallartitsisarsinnaapput inuit kulturitoqaannik tunngavilinnik ingerlatsinernik. Tamatumani aamma pikkorissaanernik ingerlatsisoqartarsinnaavoq, inuttut ineriartornermik immikkut aallussiviusunik, soorlu Majoriami nioqqutissiornermik ingerlatsinernut assingusunik aqqissuussinertigut.

Taamatut oqaaseqarluta Naalakkersuisut inassutigissavaat siunnersuut UKA 2020/41 akuersissutigineqassasoq

aammalu

UKA 2020/46, kiisalu aamma UKA 2020/85 itigartinneqassasut